

Ինչո՞ւ կու գայ Պօլիս:

Չհարցուցի, վասնզի քանի մը տարիներ առաջ հարցուցած էի, թե ինչո՞ւ Սիս կ'երթայ, եւ պատասխան առած էի, թե Սոյ աթոռն ու թեմն բարեկարգելու կ'երթայ: Քանի մը ամիս ետքն, երբ իմացայ որ զիս խաբած են՝ ուխտ ըրի, որ մէյ մ'ալ չհարցունեմ, թե ինչո՞ւ Պօլիս կու գայ եւ ինչո՞ւ Պօլսէն կ'երթայ....:

10 Նոյեմբեր

Ուրիշ հրաժարական մ'ալ:

Երզնկայի առաջնորդն ալ հրաժարելու միտք ունի եղեր:

Հոն ալ չկայ մարդ, զգացում եւ դրամ:

Երզնկայի կլիմայն անյարմար կու գայ եղեր նորին սրբազնութեանն:

Այս առաջնորդին ալ կլիմայ մը փնտռելու, գտնելու եւ դրկելու է:

Յուսանք սակայն, որ Երզնկայի առաջնորդը անիրաւ յարձակումներէ առանց վշտանալու յառաջ կտանի այն գործերն, զորս այնքան սիրով եւ եռանդեամբ սկսաւ: Եթէ կլիմայն իրեն չյարմարուի՝ նորին գերապատուութիւնն աշխատելու է զինքն կլիմային յարմարցունել, զի մի լցցի բանն, թէ վարդապետներն կփոխեն իրենց կլիմայն՝ երբ եպիսկոպոս ձեռնադրուին....:

11 Նոյեմբեր

Տեսարանն է Բերայի թատրոնի մը օթեակներէն մէկուն մէջ:

Պատուաւոր մարդու մը անպատիւ կլինն յոյնի մը հետ սիրոյ բանակցութիւն կ'ընէր:

–Տե՛ս, ըսաւ քովի օթեակի մէջ նստող մէկն իւր ընկերին, կը վայլե՞ որ անանկ պատուաւոր մարդու մը կլինն անհաւատարիմ գտնուի իւր երկանը:

–Իրաւունք ունիս. օտարասիրութիւնը չէ՞ որ մեր ազգին տունը կփլցնէ, պատասխանեց ընկերը:

12 Նոյեմբեր

–Ամբակո՛ւմ աղա, վաղը չէ միւս օր Վան պիտի երթամ:

–Բարի ճանապարհ կմաղթեմ:

–Նամակ գրելու չմոռնաս: